



**PM Modi-i Indonesia, New Zealand
aser Australia semdangtsü**

**FIFA World Cup 2026: Spain, Portugal
aser Switzerland last 16 tongogo**



VOL. XXIII ISSUE NO. 261 (ADOK 261)

DIMAPUR

KÜPTOKNÜ (SATURDAY)

CHITENI (JULY) 04, 2026

₹ 5.00

DUCC-i bars & nightclubs azüoktsü akhanger

Dimapur, July 3, 2026 (TYO): Naga Students Federation (NSF) nung finance secretary Katho P. Awomi-i Prysm ta ser nightclub ka nung ozüing alema inyaksangshiba magizüker aser bangdakpurtemi ozüingi memelaba bars, lounges aser night clubs shibangtsütsüla ta Dimapur Urban Council Chairman Federation (DUCCF)-i metetdaksüogo.

Iba nightclub ya Dimapur District Auto Drivers Union (DDADU) aser Dimapur Restaurant Union (DRU) president Tito Yepthomi meyong lir.

Shiba südir süang iba amala ozüing alema inyakba, amokmerenba inyakyim magizüker ta DUCCF-isa ashi.

Külen, Dimapur jila aser temeket nung otiotia yi ayokba outlets lapokba atema permit mesüra licenses komala agütsür ta DUCCF-isa district administration dang asüingdangogo.

Dimapur aser temeket nung bars aser nightclubs indang licences agütsü akhanger, kechiyong item tesem yagi temeket alirtem aser tsüraburtem timtemdaksüür. Arogotem aser kin teloktemia item ali kiburtem aser ki kiburtem shimokar metetpelatsüla aser peipei züingsemtemi aibelenba metetdaksütsü tim ta DUCCF-isa ashi.

Item bars aser nightclubs kiburtemia lanur taküm lendongi

idaksüba atema kechi tebilemba lir metetnür. Arogoia tetsübu mesüra shinga tsütsü tejak meshii item maparen azüoktsüla ta parnokisa ashi.

DUCCF-ia shishilembaba teloktem dang shinga tsütsü meshii tiyongtsü nung loktiliba ajungtsü asoshi noktaksü ayongzükogo.

Dimapur nung urban colonies aser wards atema tematiba telok ka ama social activism mesüra leadership tenüing amer alia tashi benshiba, ozüing alema inyaksangshiba mesüra tashiyim agi sen meshiba aitsür. Ibalata talokba ajanga Dimapur ama commercial hubs nung rongsenketzüng maparen menentsür aser sensotem külemi lia aruba nung timtem bentsür arur ta DUCCF-isa metetdaksüogo.

Kija, unions, associations, organizations mesüra student bodies-i local businesses amokmerena mesüra senotsü meshiba magizüker. ANCSU-i mapang shitak nung taoba lennir den pilaba asoshi tenüingsang agütsür, aser iba talokba atema ozüingi melaba ama mapa inyaksüla ta parnokisa ashi.

Commissioner of Police, Dimapur aser district administration-i ozüing alema lapokba bars, lounges aser night clubs shibangtsütsüla kechiyong iba ya ozüingi memelar ta DUCCF-isa ayongzükogo.

NSF & ANCSU-i Katho P Awomi den pilaa atar

Dimapur, July 3, 2026 (TYO): Naga Students' Federation (NSF)-i Finance Secretary, Katho P Awomi dak nungi mapa agiena ataba osang metetdaksüogo.

June 30 nü Katho P Awomi-i Prysm Lounge telung nung ozüing alema inyaksangshiba atema Dimapur Police-i FIR ka agizüka lir aser iba dak sendakba ken o metembang tashi NSF-i Katho dak nungi Finance Secretary maparen ajunga anenja atar ta metetdaksüogo.

"Iba ken o dak sendakba kulitem tejangja memetet tashi finance secretary ket nungi mapa ajunga anenja atar" ta NSF President Mteisuding-i osangbener dang ashi.

Nisung kari pei ajangzüktsü tebilemba nung iba talokba atema osang tai prokshir. Prysm Lounge kibur aser Dimapur Restaurant Union president-i iba dak sendakba osang jangjashitsüogo anungji nübortemi osang tai meprokshtsüla ta Mteisuding-isa ashi.

NSF-i sen memeshi ta restaurant kiburi jangjatsüogo ta NSF vice president Vimeyiekhö Vitso-ia ashi.

"Onoki iba talokba atema tiyongtsü nung noktaker aser iba nung ozü züingsem mesüra tangar densema liang, NSF-ibo koba

shitak iba nung noktaksü. Onok tangatetbatem agi len anir aser kaketshirtem o public dak sendakba tebilemtsütem atema noktaker" ta Vimeyiekhö-isa ashi.

Külen, All Nagaland College Students' Union (ANCSU)-ia taoba president Katho P Awomi den pilaba aser police-i bushisüingdang osang magütsü tashi pa ANCSU sentong ajak nung noktanga metetdaksüogo.

ANCSU-isa Nagaland Liquor Total Prohibition (NLTP) Act alema bars, restaurants aser nightclubs lapokba shibangtsütsü takhangba agütsüogo.

Iba talokba ajanga ANCSU tenüing nunga kongshiogo kechiyong Katho P Awomi-i mapang ka tir ama inyaka liasü. ANCSU tenüing memenütsü atema iba ken o metembang tashi pa sentong mesüra maparen kecha nunga mamshitsü lemtetogo ta ANCSU sangdong ka nung ashi.

ANCSU-i mapang talangka yi ayokba bars, restaurants aser nightclubs anema noktaka arur aser iba ya NLTP Act anema lir. Commissioner of Police, Dimapur aser tanga enforcement agencies-i NLTP Act anema lapoka aliba bars, restaurants aser nightclubs ajak shibangtsütsü ayongzükogo ta parnokisa ashi.

Dr. Neiphiu Rio-i Sports Infrastructure Projects 16 lapoktsüogo



July 3, 2026 nü Chief Minister's Residential Complex, Kohima nungi Dr. Neiphiu Rio-i Video conference ajanga sports infrastructure mapatong 16 sayatsüdang agiba noksa ka angur.

Dimapur, July 3, 2026 (TYO): Chief Minister, Dr. Neiphiu Rio-i July 3, 2026 nü Youth Resources & Sports Department kübok sports infrastructure mapatong 16 lapoktsüogo.

Chief Minister's Residential Complex, Kohima nungi Dr Rio-i mapatongtem sayatsü aser iba sentong nung Union Minister for Youth Affairs & Sports and Labour & Employment Dr. Mansukh Mandaviya, Dy. Chief Minister Y. Patton, Youth Resources & Sports Advisor S. Keoshu Yimchunger aser tanga MLA tem aden.

Nagaland nung saisapongbaren melenshitsü atema sorkari mapang talangka atema asalentong renema lir ta Dr Rio-i ashi.

"Linük nung tajungtiba den

kasa sports infrastructure renloksü mangdang lir. Sorkari saisapongtem nem world-class training agütsütsü aser parnokisa state aser linük asoshi konang bentsür arutsü" ta pai ashi.

Iba sentong ya ki tasentem lapokba dang masü saka Nagaland nung alir nem maongka tasentem bentsür arur ta paisa shisem.

"Saisapongba ya recreation dang masü saka industry tulu ka kümogo aser iba ajanga mapa adokdaksütsü aser maongka tasentem bentsür arutsü" ta Chief Minister Dr. Rio-isa ashi.

Tanü sayatsüba mapatongtem Khelo India scheme kübok pezü aser State-funded initiatives 12 lir. Nagaland kübok district balala nung multipurpose halls, indoor sports halls, futsal grounds aser

administrative infrastructure renemogo.

Khelo India kübok Mokokchung district kübok Changtongya aser Mangkolemba nung Multipurpose halls, Niuland district nung multipurpose hall aser Wokha nung pre-fabricated indoor sports hall ka lir.

State sorkari inyakba mapatongtem ya Kiphire, Noklak, Wokha Town nung futsal facilities, Chozuba nung futsal with amenities, Wokha Village, Aboi, Tobu, Razaphe Basa, Jakhama Town, Chief Minister's Residential Complex, Kohima aser MDSC, Dimapur nung pre-fabricated multipurpose halls aser New District Headquarters, Peren nung DYRS Office & Quarter yangluba lir.

Mongpu melenshiba ajanga aluyimba nung kongshir: CS Sentianger

Kohima, July 3, 2026 (TYO): Mongpu melenshiba ajanga Nagaland nung sobaliba nungi benshia aruba aluyimba maparen nung tetsükdaksü bentsür arur anungji asenoki climate-smart technologies aser renewable energy benshitsüla ta Nagaland Chief Secretary Sentianger Imchen-i ashi.

NBCC Convention Centre nung "Women-Led Enterprises for a Climate-Smart Nagaland" Trade Facilitation Fair lapoktsüdang pai iba ya ashi.

Nagaland nung tzünglu shitak maruba ajanga aluyimba nung kongshiogo. Tesüiba nungbo April tetenzüklen nungi metsü proker saka June tashi atsülangogo, tzünglu peria maruba ajanga tsünusenbongtsü akoksar ta Sentianger-i ashi.

Asenoki low-carbon economy agi melentsüla aser renewable energy, talisa solar

power amshitsüla. Yimtsüngtem inyaksangshi nung renewable energy ya kanga tongti kümdaksütsüla aser mongpu melenshiba den putepa aluyimba maparen inyaka aotsüla ta paisa ashi.

Self-Help Group (SHG) movement ajanga yimtsüng nung alir tetsür meyrjang aika tashi itdaksüogo saka entrepreneur aikati modern technology, institutional finance, markets, aser business support angutsüba nung tetsükdaksü ajurur ta paisa metetdaksü.

Nagaland State Rural Livelihood Mission (NSRLM)-i SELCO Foundation den yaritepa Trade Facilitation Fair ayonga amunger. Iba nung live exhibition stalls 19 lir aser item nung clean-energy technologies aser weaving, horticulture, piggyery, bamboo, & food processing atema financing solutions lir.

Nagaland nung dryers, grinders, aser cold storage units densema solar-powered equipment ajanga takoksa ajuruba ajemdaksütsü, product quality tajungba akümtsü, production costs ajemtsü aser yimtsüngtem nung mapa adokdaksütsü ta Sentianger-isa ashi.

State Bank of India, Nagaland Rural Bank, aser Nagaland Cooperative Bank ajanga yimdaklirtem yariba asoshi tenüingsang agütsür aser maneni senotsü rejutemi tetsüri aniba enterprises aser rural startups yaritsü ayongzükogo ta paisa metetdaksü.

Iba sentong nung Joint Secretary, Rural Development, & NSRLM Mission Director Moa Sangtam-i tesentepertem pelaa agizük aser SELCO Foundation Director Huda Jaffer-i Nagaland nung parnokisa inyaka aruba osang lemsatop.

Nagaland nung mezüngbuba Aadhaar Centre lapokogo



Dimapur, Chiteni/July 03 (TYO): Nagaland nung Aadhaar services tajungba kumdaktsütsü atema state nung mezüngbuba Unique Identification Authority of India (UIDAI) Aadhaar Seva Kendra (service centre) ya Hokulbarnü Purana Bazaar, Dimapur nung Labour Department office anasa Advisor, Tribal Affairs & Election, H. Tovihoto Ayemi-i semzükja liasü.

Nüburtemi ASK nung Aadhaar services atema online appointments UIDAI indang Appointment Portal (<https://bookappointment.uidai.gov.in/>) nung yanglutettsü aser pei azüingba apir anogo aser mapang shimtsü akok.

Public holidays dak alaka nüburtem hopta nung mashi anogo service agitsü mechi Aadhaar Seva Kendra ya hopta nung anogoshi lapoktsü.

Deputy Director General (DDG), UIDAI Regional Office, Guwahati, Ngachan Zimik-i ashiba agi, Nagaland nung nüburtem shilem 67 dang Aadhaar yanglua lir. Shilem 33 shi enroll süogo, anungji tang tashi enroll mesüi alirtem enroll asütsü atema onok aser state sorkari inyaker, ta pai ashi.

India nung asadangra Aadhaar saturation ya shilem 99

shi lir, tetetzü nüburtem shilem 99 Aadhaar yangluogo, ta pai ashi.

Dimapur nung enrollment saturation ya shilem 95 shi lir, saka Kohima densema tanga district tem nung kanga ajema shilem 68 shi lir aser tanüingba districts tem nung shilem 59 nungi 63 tsüngta lir, ta ashi.

Anungji Nagaland nung mapa inyaktsü jenti lir, aser iba atema Seva Kendra yagi mapa tuluka nungshitsü, ta Zimik-i ashi.

Sentong nung Advisor Tovihoto-i jembidang, Nagaland nung mapang talangka nungi Aadhaar Seva Kendra ya aginüa liasü, aser tanü asenoki aji semzükogo aser mapa shidak inyaker, ta ashi.

Iba linük nung aliba senso ajunga asoshi Aadhaar ya alitsüla, aser tongtipangtibaji, tanurtem arishi küm pongu tekübok aser arishi küm 15 nung khien mandatory biometric updates (MBU) agitsü nüngdaker, ta ashi.

Kechiaser item ya school-i aor, aser na school nung admission asütsü, nü scholarship, capacity balala nung entrance exams agütsütsü atema nai Aadhaar nüngdaker.

Tanü Nagaland reprangdangra, Aadhaar enrollment kanga ajungbo masü.

Asen state nung centers 150-160 shi lir, aser tawa School Education mesüra par department nunga item centers amenoka school shia nung enrollment agitsü meranger, ta Advisor Tovihoto-i ashi.

Asen nüburtem, talisa teintet rogotem, matamabensar aser tila tanurtem mela-mela enrollment agitsü atema nüngdakba ajak peria agütsütsü asoshi asenok ajak teka amteper inyaktsü, ta pai ashi.

Ngachan Zimik-i arishi küm 5 aser 17 tsüngta tanurtem MBU agitsü nüngdakba indang nenshia ashi aser Aadhaar authentication nüngdakba services timtem makai agitsü asoshi mapang shidak nung biometric updates asütsü ajungshia liasü.

Aadhaar Seva Kendra tasen lapokba ajanga Dimapur aser temeket tesemtem nung alirtem Aadhaar service agiba nung tali tajungba akumtsü.

Iba centre yagi anogo ka nung Aadhaar enrolment aser updates 250 tashi inyakter. Nüburtemi Aadhaar enrolment aser address, tenüng, gender, tasoba anogo, mobile number, email aser biometric details (photo, fingerprints & Iris), download eAadhaar, Print Aadhaar etc amala services tem iba center nungi agitettsü.

Kohima NCORD Committee senden amen

Dimapur, Chiteni/July 03 (TYO): Kohima District Committee for the Narco Coordination Centre (NCORD) senden ka Deputy Commissioner, Kohima, B. Henok Buchem lenisüba kübok pa indang office chamber nung July 3, 2026 nü mena district nung temesepba mozü amshiba aser shibelenba azüoktsü mechi mera balala agiba asadanga liasü.

Senden nung mendenpuba Deputy Commissioner-i taoba senden amenba sülen mera agibatam lepa reprangshia liasü aser department balala dang district nung temesepba mozü dak sendakba tebilemtsü samadaktsütsü asoshi teka amteper inyaktsü ayongzük.

Drug Inspector-i district nung pharmacies tem audits aser surveys agiogo aser iba mapang retail pharmacies 15 aser wholesale establishments pongu nung mela aliba ama

inyakba ngutet, ta senden nung ashi.

Kohima district nung registered wholesalers tenet aser registered retailers 70 shi lir, ta metetdaktsü. Parnoki item inspections mapang invoices, storage conditions, liwar aliba mozü indokba, Schedule H1 drugs peria aliba aser CCTV records tem repranga liasü.

Police Department-i district nung ozüing amshiba inyakim osang lemsatepdang, tawa temesepba mozü dak sendakba ken o nung nisung pezü pua lir ta ashi.

Parnoki colonies ajunga nung Drug Intervention Programmes (DIPs) tenzükba aser drug-free zone inyakim indang lemsatepa liasü.

School azünger temi temesepba mozü amshiba tali akumba aser kakat rejutem nung awareness sentongtem tali tajungba agütsütsü

nüngdakba parnoki shia liasü.

Sensaksemba mapang Deputy Commissioner-i school tem nung temesepba mozü putettsü asoshi yimya aser hadir amshiba indang osang aginüa asüingdanga liasü.

Drug Inspector-i tendangba ya timba Forensic Science Laboratory (FSL) nung metaloka lira ser iba indang report angutsü ita aika atatsüsa akumer, anungji mapang shidak nung bushisüingdang mesüteter, ta ashi.

Senden nung temesepba mozü shibelener temi yimya balala amshiba indanga jembia liasü.

School Education Department-i temesepba mozü amshiba kaketshir nem counselling agütsür aser kakat reju anasa moko ayoker nem ozüing agi mela aliba ama temerenshi agütsür ta metetdaktsü.

Census 2027 HLO nung CM ki-a züngokogo

Dimapur, Chiteni/July 03 (TYO): Tang tenzüka aliba Census 2027 House Listing Operations (HLO) nung shikem ka ama Chief Minister's Residential Complex, Kohima nung Nagaland Chief Minister aliba ki house listing exercise kübok July 2, 2026 nü züngokogo.

Chief Minister, Dr. Neiphiu Rio aliba indang house listing ya Deputy Commissioner & Principal Census Officer, Kohima, B. Henok Buchem, NCS-i anir inyak aser iba mapang Director, Census

Operations, Nagaland, Dr. Keneilhoutuolie Miachieo, IFS; Charge Officer, Kohima Sadar Rural, Seyiekhrietuo Solo, NCS aser Census ketdangsürtem liasü.

Census 2027 House Listing Operations kübok shia aliba ama iba exercise ya inyaka liasü.

House Listing Operations ya Census 2027 indang mezüing phase lir aser iba mapang ki aser yangji aliba nüngdakbatem indang osang bendener, koba nütsüingsük züingdangba nung yaritsü.

Lok Bhavan nung COOPS Day & Cooperative Week amung

Dimapur, Chiteni/July 03 (TYO): Lok Bhavan Kohima nung July 3, 2026 nü COOPS Day & Cooperative Week (Commemorating Five years of Ministry of Cooperation) anogomung sentong ka agiba nung Nagaland Angh Nand Kishore Yadav dena liasü.

Sentong akhumdong ka ama pai iba sentong nung jembidang, cooperative movement ya pei sasa pei yariba, kati ka yariba aser külemi mapa inyakba tanüla nung tera yanga lir aser linük tesem ajunga nung ajak dak kongshia ainba aser nüburtem nem tashi agütsüba nung tongtipang shilem agia lir, ta ashi.

Iba sentong ya tongtipang lir, kechiaser ibai International Day of Cooperatives 2026 temaitsü lir aser Ministry of Cooperation, Government of India küm pongu ajungba bilemtetba lir, ta pai ashi.

"Sahakar Se Samriddhi" (Prosperity through Cooperation) mangdang kübok Ministry-i White Revolution 2.0 densema tongtipang sentong aika inyaka cooperative banking tashi itshidaktsür, Blue Economy ajungketer aser cooperative education aser leadership development nung rongsen indoker aser ibaji ajanga cooperatives ya Atmanirbhar Bharat atema tongtipang drivers ama akumer, ta pai ashi.

Nagaland nung teimla aliba indang lemsatepdang, dairy, fisheries, piggery, handloom, handicrafts aser organic agriculture nung maongka jenti lir, ta Angh-i ashi.

Pai Nagaland State Cooperative Bank, State Dairy Cooperative Federation aser tanga cooperativefederations temi aluyimer aser producers atema market accees ulushija value chains tashi itshiba nung tongti shilem agiba lemsatepa liasü.

Tarutsü asoshi renema aliba cooperative sector atema technology amshitsü, lanurtem nem shilem agidaktsütsü ajungmesotsü, tetsür temi aniba enterprises nem tashi agütsütsü

aser skill development nung senotsü indoktsü tim ta pai ashi.

Minister, Public Health Engineering Department (PHED) & Cooperation, Jacob Zhimomi-i jembidang, linük yangerba nung cooperative sector-i ola madoki shilem tajung agia grassroots economic tashi itdaktsür, ta ashi.

Mangdang tajung akaba lenir Ato Kilonser Narendra Modi kübok 2021 küm asendenshir ajungmesoa iba sector ya Aatmanirbhar Bharat (Self-Reliant India) mangdang nung tongtipang tongshi ka kumdaktsü, ta ashi.

Pai stakeholders ajunga dang cooperative movement tashi itshitsü, pei peria, yimchiyimjung aliba Nagaland yangertsü asoshi temulungtetba nung lungjemer külemi inyaktsü ayongzüka liasü.

Iba sentong tenzük dang Nagaland Angh Nand Kishore Yadav-i virtual yimya nung Model Cooperative Society Offices pezü - Thenumia Kehou Multipurpose PACS Ltd., Vidima Village, Chümoukedima; Shurho Multipurpose PACS Ltd., Kigwema Village, Kohima; Chedema Multipurpose PACS Ltd., Chedema Village, Kohima; Punglwa B Village Women Livelihood & Credit Cooperative Society Ltd., Punglwa B Village, Peren semzükja liasü.

Sentong tenzüka Bendang Longkumer-i pela agizükba o jembi aser Department of Cooperation ajanga tesüiba küm pongu tsüngta takok balala anguba aser inakyim balala indang video tatsüka sayua liasü.

Maneni rural cooperative züngsem temi takok anguba indang lemsatep aser Ladongwati, Managing Committee Member, Sunghen Tsuyonger PACS, Tuli, Mokokchung aser Mongshai, Chairperson, Khamnnyaan PACS, Noklak Village ajanga cooperative societies temi yimdak yimtsüng nung teyari agütsüba indang lemsatepa liasü.



July 03, 2026 nü New Delhi nung Union Minister of Labour & Employment & Youth Affairs & Sports, Dr. Mansukh Mandaviya aser Minister of State for Youth Affairs & Sports, Raksha Nikhil Khadse na leniba nung Industry Association Conclave senden amendang tangokba noksa nung angur. Iba sentong ya Department of Youth Affairs-i ayongzük.

Pakistan-i kiralongra manen tashi IWT agiena atatsü: MEA

New Delhi, July 03 (Agencies): Indus Waters Treaty (IWT) kübok India-i Pakistan nem parnok shilem tzi magütsüba atema anogo ishika tejaklen Pakistan-i India amokmerenogo.

Hokolbarnü Centre sorkari, India nungner tangatetba memelenshir aser Pakistan-i kiralongra manen tashi iba (IWT) tezüngzüktep ya agiena atatsü, ta metetdaksü.

India amokmerenba olen ka nung anogo ishika tejaklen Pakistan nung Climate Change Minister Musadik Malik-i, iba tezüngzüktep kübok Pakistan nem tzi tim shilem magütsürtem teka alangdoktsütsü, ta

metetdaksü.

Pakistan nung Information Minister Attaullah Tarar-ia, 1960 küm World Bank-i ketdangsüa IWT tezüngzüktep ya agia liasü aser iba ya ozüng agi alena lir, anungji telok kati dang iba tezüngzüktep agientsü mesüra yanglushitsü makok, ta metetdaksü.

Hokolbarnü osangbenertem den jembidang Ministry of External Affairs (MEA) otongdar, Randhir Jaiswal-i, "Indus Waters Treaty dak sendakba nung India tangatetba memelenshi. Pakistan-i arrtsü adener kiralongraba pusemba manen tashi onoki iba tezüngzüktep agiena atatsü.

Onoki Pakistan dang arrtsü adener kiralongra pusemba anenang ta mepishitsü," ta metetdaksü.

Pakistan nungi kiralongrartemi Pahalgam amakba sülen India-i, kiralongra aser amalitem na külemi aotsü makok, ta shia Indus Waters Treaty (IWT) ya agienogo.

Iba mapang nungji Ato kilonser Narendra Modi-ia, azü aser tzi na külemi ayimtsü makok, ta metetdaksü.

Pakistan-i, India-i IWT agienba ya ozüng alema lir aser rara ayongba den kasa lir, ta shia India nungner telemetba sashia aitsüba den külemi India amokmerener.

Ram tekülem ki tenla auyaba ken o SIT-i maneni bushisüngdang

New Delhi, July 03 (Agencies): Uttar Pradesh state kübok Ayodhya nung Ram tekülem ki tenla auyaba osang temai adokba sülen iba ken o bushisüngdangtsü atema state sorkari Special Investigation Team (SIT) tenteta liasü.

SIT-i maneni bushisüngdangba mapang nung Ram tekülem ki atema tenla agütsüba senotsü aser sentioaset aika samaba ya asalentong yanglur inyakba liasü, ta bushitetogo.

SIT-i iba ken o nung tai tonglokja alirtem indang phone nung WhatsApp chats ajanga senotsü tim mesüi amshiba aser sen auyabaji parnok tsüngda lemsatepa agiba bushitetogo.

SIT-i tenla aruba senpong dang masü saka Ram Temple Trust-i kiojen alizükba official records-a ajak bushisüngdangdar.

SIT-isa kiojen alizükba nung shilem agirtema jaoka asüngdangyar aser kiojen alizükba mapang nung sen alepzüka agiba-a bushisüngdangdar.

Tai tonglokja alir rongnung ka, Avinash Shukla-i Ayodhya nung senotsüji amshi aser tasa balala amshia senotsüji mim ta bushitetogo.

Hopta shia tekülem ki tenla azüngba nung pai tongti shilem agia liasü aser tenla nungi

ayazükba senotsüji parnok tsüngda lemsatepa agi. Iba dak alia kimong alizükba mapang sen agütsütep dang sen alepzüka agiba nung pai shilem agia lir.

Ano Ram tekülem süngküm nung lokti tulu achaayangtsü atema Anukalp Mishra "Service Volunteer" (Vyavastha Karyakarta) shima liasü. Iba maongkaji agia pai-a tenla auyaba nungji shilem agiba bushitetogo.

Ram tekülem kidang mapa anguba sülen mapang tatsüka tsüngda yaküm May ita nung Anukalp Mishra-i gari ka ali, aser par kidang Ram Katha sentong ayongzüka pai sen lakh 50 dak tali indoka liasü, ta SIT-i bushitetogo.

Ram tekülem tenla auyaba ken o temai adokba sülen temzüng aika melenshiogo. Tang nungibo staff tem nem anüng sentsü uniform agütsütsütsü aser uniform nungji pocket ka danga keta mali, staff tem ajak telungi maidang security checks anaben agitsü, mobile phones, cameras, yanghu aser nija oset kecha memelatsü aser tsüngsem-a kima semzüka ayutsü.

Tang nungibo tenla senji table nung mener masü saka atem nung mener azüngtsü.

SIT-i maneni iba ken o ya lenla aika nungi bushisüngdangdar.

PM Modi-i Indonesia, New Zealand aser Australia semdangtsü



New Delhi, Chiteni/July 03 (Agencies): Hokolbarnü External Affairs Ministry (EAM) nung secretary kati-i, Ato kilonser Narendra Modi-i July 6 nungi tenzüka linük asem- Indonesia, Australia aser New Zealand semdangtsü aser item linüktem den tesendaktep tajungba akümstü atema jembitsü, ta metetdaksü.

Ato kilonser Modi-i Indonesia mezüng semdangtsü, iba sülen Australia semdangtsü aser tesüsa New Zealand semdangtsü.

Osangbenertem den jembidang External Affairs Ministry nung Secretary (East), Rudrendra Tandon-i, Modi-i New Zealand semdangbaji tesüiba küm 40 jungnüa tsüngda tang mezüng India nungner Ato kilonser kati New

Zealand semdang asütsü, ta metetdaksü.

New Zealand Ato kilonser Christopher Luxon-ia social media ajanga, taruba hopta Modi-i linük semdangtsü ta metetdaksüogo.

Luxon-isa, India ya alima nung linük tulutibatam aser rongsenketzüng kanga kera ainba linüktem rongnung ka lir, aser iba linük ya New Zealand atema kanga tongtibang, ta ashi.

Luxon-i, "April ita nung agiba tezüngzüktep- New Zealand-India Free Trade Agreement ajanga linük ana tsüngda tesendaktep jenjang tajungba akümer, aser iba ya

ajanga New Zealand nung mapa aika adoktsü, exports jenjang tajungba akümstü aser rongsenketzüng kanga aintsü," ta metetdaksü.

India aser New Zealand na tsüngda free trade agreement (FTA) tezüngzüktep agiba dak sendakba nung Luxon-i, iba tezüngzüktep agiba ajanga maongka tasen aika angutsü, New Zealand nungi nütsüng billion 1.4 (India nungertem) atema osettsüset aser services agütsütsü, aser ibaji ajanga yangi mapa aika adoktsü aser taa teimba akümstü, ta ashi.

Linük ana tsüngda rongsenketzüng aser investments ajungketsütsü nükjidong nung taküm April ita nung FTA tezüngzüktep agia liasü.



ALL INDIA INSTITUTE OF MEDICAL SCIENCES
ANSARI NAGAR, NEW DELHI - 110 029
Web: www.aiims.edu



SANGDONGER
ADVERTISEMENT NO. AIIMS/New Delhi/Director Rect./2026-(FC)
Anogo 27.06.2026

All India Institute of Medical Sciences, New Delhi nung Director menden atema Non resident Indians aser Persons of Indian Origin densema India nungner sensotem dang applications meshir, aser ibaji Registered Post/Speed Post/e-mail ajanga Institute indang e- mail ID- dda@aiims.edu nung agütsütsü akok.

Qualification & experience/tanga telatetbatemji web site: www.aiims.edu aser www.aiimsexams.ac.in & www.mohfw.nic.in nung angutsü.

Application agütsütsü atema tatembangbuba anogoji osangkakettem nung advertisement agütsüba anogo nungi tenzüka anogo 30 asütsü.

CBC : 17112/11/0026/2627

(DIRECTOR)



July 03, 2026 nü New Delhi nung Ministry of New and Renewable Energy (MNRE) Secretary, Santosh Kumar Sarangi-i ketdangsüa India aser Japan na tsüngda tezüngzüktep agidang tangokba noksa nung angur.

No. Admin-12011(16)/2/2024-eoffice
Government of India
Ministry of Health and Family Welfare
Directorate General of Health Service
Central Drugs Standard Control Organization
(Drugs Section)

Ministry of Health & Family Welfare-i tsünglanglen agüja aliba ama Regional Drugs Testing Laboratory, Guwahati nung post balala atema temsüa aliba candidates dang nungi applications meshir, aser iba post ji Deputation (short term contract densema) nung asütsü. Tejangrar candidate temi application den Bio-data tejangjaji osangkakettem nung iba advertisement agütsüba anogo nungi tenzüka anogo 60 tsüngda **Shri Pawan Kumar, Deputy Director (Admn.), Central Drugs Standard Control Organisation (CDSCO), FDA Bhawan, Kotla Road, New Delhi-110002** nem agütsütsüla.

2. Osang tejangja metettsü atema CDSCO indang website <https://cdsco.gov.in> nung reprangang.

Sl. No.	Name of the Post	Pay as per 7th CPC	No. of Post	Office for which the post is filled up
1.	Scientific Officer	Pay Level 10 of 7th CPC (Rs. 56100 - 177500)	01	Regional Drugs Testing Laboratory, Guwahati


Director (Admn.)
C.D.S.C.O Headquarter, Directorate General of Health Services
Ministry of Health and Family Welfare, New Delhi - 110002
CBC : 17194/11/0011/2627



TIR YIMYIM YIMOBILEM (EDITORIAL)

DIMAPUR

KÜPTOKNÜ

CHITENI 04, 2026

Ajak külemi takar kümdi

Alima tesem aika nung nisung ishika takarba takarba akümer aser nübortem teimbaka sensakba sensakba akümer, iba jagi takartemjia sademsadema melitetter aser sensakertemjia pelaa malir. Iba kasaji, Nagaland nunga nisung ishika kanga takar aser nübortem aika kanga sensaker ta kuma aoba angur aser ajangshir. Iba tensa tiaji shisabolutsuka lir, kechiyong koba lima nung südirsüaka nisung kar chiyongtsü chir mechima endoker aser senotsüa agir magima bendener saka nisung teimbaka pei boksung mangur, tanurtem kaketshidaki meyokteter aser shirangba mapang mozüjang kata alia mechteter ta asüba lima aser loktiji kodanga sünepa malitsü. Iba lima nungji ashir auer, rakzükratemer aser tashiyim amshia mapa tamajung inyakertem agi tali majungtsü, anungji takartema pei kidang tsübuseta alitsü aser kima yimdong nunga tetsübu agi sadema mesenzütettsü. Aji oda, Nagaland nung takar akümertem ya reprangdangra, meranga inyakba nungi mesüra ochishia bendenba nungi akaba rongsen masü saka nübortem meyong nübortem nem magütsü ser mimzüka agiba agi akaba purtem lir. Ibaji mangatetertem atemabo jangratemtsüka asütsüa akok saka tangatetertem atemabo item ama rongsen akabaji shisabolutsuka lir, kechiyong sensakertem meyong sensakertem nem magütsü ser sensakertem meyirijang aika tenung nung pei agitsü rongsen bendenbaji temoatsü masü atakatam kümadoktsü. Aji oda, sensakertem meyong rongsen bendena asen akabaji, atangji, mapang tatsüka atemabo kanga takar kuma alitsüa akok saka iba rongsenji pei taküm lia aser pei nük agi ngua samatsü, kechiyong auyaba, rakzükratema aser sensaker meyong bendenba agi takar akümba rongsenji senmang kuma maotsü. Iba rongsenji aazükarotsüba masü mazükmaro atentsüba rongsen lir. Iba amaji asenokia asen lima nung asen tenük agi ngua, sensaker agi ajungbena tulur takar akümertem küm ishika tsüngda asenokisa repranga lia pei alidak kia maka ser tamasaba jenjang dang nungibo tesüsaba jenjangsa tamajungba ser alima nungi pilaba nguogo. Itemji asenok akümlirtem asoshi tangazüktsü lesson lir, ajisüaka asenoki tan masür aser tangar sensaker aser ola madoktetertem meyong rongsen agi takar akümbaji pei taküm nung takok tulu angu amai bilemer. Aji oda, tanü putu ya akhi tsürabur mapang sü achiba putu asünungbo, sensaker rongsen rakzüka takar akümertem rongnung raktepa sü chitepba ajangshila ta bilemer. Tanü Nagaland nung lenirtemi bilemdanga tarutsü anogotem ajungtsü asoshi reprangteta inyaka toktsütsüba mapa tongtibangtibaji Nagaland nungbo Naga nunger ajak külemi takar akümtsü merangtsüba teinyaktsü mapa ya asütsü. Atangji, alima nung nisung ajak kasasabo takar mekümtettsü, saka takar ta asüba tetezüji nisung shia pei nüngdakbo tangar dang apua magii litettsüsa akabaji takar lir. Ibaji government shia nükjidong lir. Iba nükjidongji mamai government nung yimsüsür aser ketdangsertemi inyakra, pei takar akümba dang nungi tuluba tesünep aser tepela angutsü. Pei takar akümba agi pei chirnurtema nümamedangtettsüsa aliba dang nungibo aseni tangar takar kümdaktsüba agi asen nümadangdanga pelaa alibajisa tajungba. Yangji temoatsü senmang tulu lir. Aji asenoki inyaktettsü aser agitettsü.

OLEMSABANG

Ochi-ji tashiyim agi nembanga meyutettsü

L. Kika Pongener

Tanü asen lima tia reprangdangra; tashiyim agi ochi ola madokdaksüi nemdema ayutsü merangba lima ka mesuka kuma odagi. Tanü asen lima nung osangkaket aser media ajanga nuburtemi pei tebilemba aser tangatetba lemsatepa ocet züluba; tashiyim agi amokmerena nemdema ayutsü merangba; iba sobaliba tentet tamajung ka tenzükogo. Ajisuaka, ochiji tashiyim agi amokmerenba; mesura temzüng-ozüng agi kodanga nembanga meyutettsü aser miimbanga ayutsü merang-aka miima meyutettsü. Koba linuk nung sudir suaka; sorkar nung yimsüsür; yimden aser loktiliba sabang balala nung lennirtemi nubur mulungjang metettsü; nubur tebilemba aser taginuba metettsü kanga tongtipang lir. Yimsüsür aser lennirtemi nubur taginuba aser tebilemba meteta yimsu sura aser linukji anira....Linuk nung yimjung aser tesunep alitsü, yimden aser loktiliba ajak renloka tejakleni aotsü. Osangkaket aser media nung nuburtemi pei tebilemba aser taginuba lemsatepa ocet zülubaji; nubur asoshi tagitsüla sura agitsü aser magitsüla sura magitsü. Ajisuaka, nuburtemi pei tebilemba aser taginuba lemsatepa ocet zülubaji; tashiyim agi amokmerena nemdema ayutsü kija aser lokti-tentet shinga-ia memerangtsüla.

Tanü putu nung asen lima nung; loktiliba aika nung reprangdanga ora; shirnoki ochi jembir, shirnoki ochishia inyaker, shirnoki ochishia metongshitsür, shirnoki ochi kuli agütsür aser shirnoki tim masüba nungpo yabo tim masü-a ta ochishia arrtsür....Parnok-jibo lokti mapa nunga metenzükdaksünur; kechiyong koba lokti nung ochishir dena lidir; idakji ochimashir lennirtem ochimashi mapa inyaktsü mesademer. Yongji, ochishirbo küm talangka metenzükdaksüi sodi agüja-atoker. Ajisuaka, shirnoki anemsu agi majung sernung junger ta....Meshitak sernung shitaka ta o tanep aser o tanang jembir; aser meshitaka ta ajitet-yongjia mangu amai yutsür aser nungsen magir....Parnok-bo term asem-pezü tashi sodi magütsüi tenzükdaksünur. Tanga lokti-tentet oda yutsür....Tamang yimsu dak sendakba lokti-tentet aser Tsüngrem tenzükba mapa nunga dena ochishirbo lokti nungi agiena ayur. Ajiser, ochishirbo nubur aikati nepeta arishir aser aikati sempar. Yongji, tanü asen lima nung ochi jembitsü, ochi ola atoktsü aser ocet zülutsü nubur aikati temulung mouluteter aser tasü-maiter.

Tanü asen lima nung shirnoki ochi jembir; sabang balala nung ochi kuli agütsür aser osangkaket nung nubur ajungtsü asoshi pei tebilemba ocet zülur....Parnok-ji lokti-tentet balalai sashi-sashia aitsür aser ochi ola madokdaksüi amokmerena nemdema ayutsü meranger; aser karbo yimden sabang nung jaoka tenarong mesuker; lokti nungi jentokba; yimer nungi jentokba; kin-kidong nungi jentokba; kimang-sosem nungi jentokba....Iba amaji inyakba angazük dang kanga sasar. Aji oda, koba linuk, koba yimden aser koba lokti nung tashiyim agi amokmerena ochi remsepa ayutsü merangdir....Ajibo alima yimya libaliru aser ochi (Universal truth) anema inyakba asütsü. India nunger linuk temzüng-ozüng (Constitution) nunga; senso ajak nem pei tangatetba aser pei tebilemba jembitsü aser lemsatepa zülutsü temeden (Rights) agüja lir. Ajisuaka, yimden bangdak aser lokti-tentet kari iba temeden-ji tashiyim (Force) agi amokmerena nokdangra....Ajibo linuk temzüng-ozüng anema inyakba mapa asütsü. Aji oda, ochi-ji kechi-komaka miimbanga ayutsü merangyongjia; kecha tashi agia miimbanga meyutettsü.....Ochi-ji kenubo pa sasa yimjak nung jungkai adoktsü aser kilem manung tur ayimtentsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Mumbai nung Khristan tem anema inyakba nokdangtsü mepishi



Mumbai nung aliba Mount Mary Church nung Khristan tem tekülem sentong nung ken atendang tangokba noksa nung angur.

July 03, 2026: India nung rongsenkettzüng yimtiba, ta züngshiba Mumbai nung Khristan tem aser lokti tentetemi police dang yimti nung Khristan tem amakba aser Khristan tem tekülem sentong tagidak mapang nung timtem agütsüba nokdangang, ta mepishi.

'Mumbai for Peace' ta ajaba teloki July 2, 2026 nü Mumbai Commissioner of Police aser Joint Commissioner of Police (Law & Order) na nem temepishiba shidi ka agütsü.

Iba telok nung züngsemtemji yimsü balala amangertem nungi lenirtem lir.

Khristan, Muslim, Jain aser Hindu nung nung 24-i Police tongti ketdangsertemji ajuru.

Putir aser taoba mapang Mumbai nung aliba St. Xavier College nung Principal inyaksang, Frazer Mascarenhas-i, "Onoki police ketdangsertem ajurua, yimti nung Khristan tekülem sentong tagidak mapang nung telok balalai amakba tatalokba osangtem metetdaksüogo. Iba yimti ya akhidang nungi yimsü balala amangertem tsüngda

tesünap nung aliba yimti ka lir," ta ashi.

Ajioda Joint Commissioner of Police Manoj Kumar Sharma-i ozüing shidak benoktsü atema police-i inyaktsü ta shiogo. Putir Mascarenhas-i, "Yaküm nungi tenzüka Mumbai nung Khristan tem aser pastor tem anema inyakba kanga bulua akümer," ta metetdaksü.

Osangbener den jembidang of Bombay Catholic Sabha (Council) otongdar, Dolphy D' Souza-i, "July 5 nü Khristan tem sarasadem sentong ka agitsü ayongzüka aliba amokmerena Sakal Hindu Samaj (All Hindu Society) teloki ozülü ka lemsatep aser iba ozülüji onoki police nem agütsüogo," ta metetdaksü.

Vishwa Hindu Parishad (World Council of Hindus) aser parnok indang youth wing, Bajrang Dal nati Khristan tem amokmeren.

D'Souza-isa, "Iba ya yimjak nung odiodia Khristan tem amokmerenba lir, anungji iba ya nokdangtsüla. June ita kija nunga Mumbai nung Hindu yimsü alia amangertemi Khristan tem sarasadem sentong tagidak mapang timtem

agütsüba tatalokba 8 lir," ta metetdaksü.

'Mumbai for Peace' teloki police tongti ketdangsertem nem agütsüba temepishiba shidi nungi yimti tesem balala nung Khristan tem sarasadem sentong tagidak mapang timtem agütsüba nung shilem agir Hindu nung nung 24-i Police tongti ketdangsertemji ajuru.

Hindu right-wing nung inyaker, Ankit leniba nung yimsü alia amangertemi Khristan tem amaker, ta parnok metetdaksü.

D'Souza-i, taküm June 12 nü Mumbai anasa Vasai nung Khristan tem adenshia aliba mapang nung Yadav leniba nung telok lokti kati Khristan tem amak, ajisüaka ibaji nokdangtsü atema police-i kecha meinyak, ta metetdaksü.

Tesülen police-i ken o ka benok, ajisüaka aibelenertemji ka danga mapu, ta paisa shisem.

Centre for Study of Society & Secularism nungi Muslim nung nung, Irfan Engineer-i, "Hindu yimsü alia amangertemi Hindu vote bank atema yimti nung yimjung raksatsütsü meranger. Parnoki asalentong yanglur Khristan tem aser Muslim nungertem amaker," ta ashi.

ANOGO ABEN TSÜNGREM DEN

Mamangertem den süngra mesütepi külemi teputep - 2 Kor. 6:14

Satiba masüngteti aliba ajanga kibong lanu aika nung teraksa adoker. Satibaji süngra ka lir. Süngra mesütepi külemi aputsü Laishibai memelar (2 Kor. 6:14). "Nai nashi ka aser gado ka külemi alu meladaksütsüla" (Tazüing. 22:10).

Tejen aser Tasen Lai anapronglai mamanger den sati masütsüla ta aitsür. Temeshi metsü mamanger den meyoktepba dangji ozüing raksaba aibelenba ta ajar (Ezra 9:1-6). Amitsüra mamanger den satitsü memelar. "Kinüngbo süra lai shiba dangi onüdir, la mulung, saka Kibuba dak amanger rongnung dang la keyi odakjang" (1 Kor. 7:39).

Tsüraburi mamanger den alitsü shiaka, kechi kuli südir süang nai aji magizüktsüla. Tsürabur dang tashi angabajia Kibuba nung asütsüla (Ef. 6:1). Na mamanger ka den meimtepa lir, nüdongji tamanger maküm tashi temeimtep. Sati asütsü atema dang batiptsübaji kümdangang!

Karbo kibong kümer külen amangtsü akok. Saka iba nungi ochibaji madoktsü akok. Laishibai ashir, "O kinüngtsü, nai kinüngbo kümzüksü asü masü, nai koda metet? Mesüra, O kinüngbo, nai kinüngtsü kümzüksü asü masü, nai koda metet?" (1 Kor. 7:17). Satibaji kanga kümdanga agitsüba mapa lir. Nai aibelenamamanger kati sati sür lira, nai pa/la tekümtet asoshi sarasademtsütsüba dak alema tang kecha inyaktsü makok.

Kibong asüngtetta maliba jagi tarutsü putu raksa ta metetta Khristan ministertemi ibai kanga nendaka angatetdaksütsü tenüngdaksü. India nung nung sobaliba nung tanga tamang yimsü pur ka den satira pa/la par telok nungi jentoker. Arogoi itemji junga anepalutsüla aser yaritsüla.

Venezuela menoknok lendong nung California nungi pastor ka asü



Pastor Romildo Batista DeLima aser par kibong züngsemtem noksa nung angur.

July 03, 2026: Tawa California nungi pastor ka aser pa kinüngtsü na pa asoba anogomong amongtsü atema Venezuela-i oa liasü, ajisüaka tia maka Venezuela nung menoknok lendong atalokba mapang nung pa asü aser pa kinüngtsü kanga mejungi yiruo.

Pastor Romildo Batista DeLima ya Riverside, California nung aliba Worship Church Ministries nung pastor teinyakdak liasü.

June 21 nü pa arrshi küm 69 ajungba amongtsü atema pa kinüngtsü, Carlha Nacarid tena Venezuela-i ao aser pa asoba anogomong amongba sülen

anogo asemnü dang lirbo Venezuela nung 7.2 aser 7.5 magnitude nung menoknok anaben anoka liasü.

Menoknok anokba mapang nung pastor aser kinüngtsü na kiojen chirepba lendong nung yiru, ta par kinüngertemi metetdaksü.

Par kinünger Luciene Ferreira-i, "Mapang tatsüka tsüngda ajak melenshi. Menoknok anokba mapang nung tena madak jara chirepa liasü. Pastor Romildo kümzüka hospital-i anir aoba sülen tajungtiba nung yari, ajisüaka taküm meküzmükteti süogo," ta metetdaksü.

Laisa, "Carlha Nacarid-a iba lendong nung yiru, ajisüaka labo kümzükgogo. La tetsüing ana sükdang aser telongpu teloktep raksa. La surgery agitsü," ta metetdaksü.

Pastor Delima'er medemer Pastor Miguel Gonzalez-Mateo-i, pastor Delima aser pa

kinüngtsü na amongba hotel ji menokdnok lendong nung chirep, ta metetdaksü.

Paisa, "Onoki pa teti menüngratsü. Pa ya kü akang tembar liasü. Onoki par Arogo nung züngsemtem atema jashia bilemtsür aser par kibong atema sarasademtsür," ta ashi.

Pastor Delima'er jabaso kati, hotel nung jara chirepba lendong nung par tsürabur ana yiru, ta metetdaksü.

Par kinüngertemi, pastor Delima ya ajemalu aser temeim aketba tamangtir ka liasü, ta ashi.

Pa kinüngtsü medical treatment agitsü aser pa tasümgang Brazil-i bener aotsü atema par kinüngertemi fundraising campaign ka tenzüka liasü.

Akümlü mapang nung pastor Delima-i pa asüba sülen Brazil nung tetsü leper anasa pa mang remdaksünüa liasü.

"Pai dang masü

kinüngertemi pa tasümgangji Brazil nung tetsü aser par kinüngertem leper anasa remdaksüner. Tang ama tensa ka nung pa tasümgang kidangi bener arutsü atema senotsü aika nüngdaker, ibayongji kinüngertemi sorkar agency tem dang yariang ta mepishi, ajisüaka tang tashi nung telangzüba mali," ta kinüngertemi metetdaksü.

"Onoki teyari bushia anogo aika süidaksüdar. Onoki sorkar agencies aser tangartem dang teyari meshiogo. Romildo tasümgang bener arutsü aser Carlha medical treatment atema onoki teyari bushi, ajisüaka tang tashi nungbo onoki teyari mangur. Teyari meshitsüji kanga tasak, ajisüaka tanga lenmang mali," ta metetdaksü.

June 24 nü Venezuela nung menoknok lendong atalokba sülen tang tashi nung nisung 2,200 dak tali asüba aser 10,000 dak tali yiruba jangjaogo.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Yinzü

(n) merang agi yangluba süngzü (wire made of iron or aluminium)

* Electric yinzü mesanga alidak kanga kümdangtsüla.

Yinzü

(n) yin tazü, yin molutettsüba long (iron ore)

* Asen lima anüdoklen yinzü adokba tesem lir.

OLONG PAITEP # 7554

1			2						3
4							5		
		6					7		
									8
	9				10				
11									
12					13				
			14						

TIPIEN

1. Tarutsü atema angazükba - (8)
4. Tsüngrem anemsang - (6)
5. Senshi - (4)
6. Taküm lir - (4)
7. Taleptsü oset - (3)
9. Ayim - (3)
10. küm semer - (4)
12. Rara dang amshiba oset - (4)
13. Aor kidong tenüng ka - (6)
14. Ajak madak Kibur - (8)

LANGTSÜNGLEN

1. Temin sülen aliba shilem - (6)
2. Asaya - (9)
3. Teküboktiba meimchir tia - (4)
5. Ngashi aou nung tsünga ayuba - (9)
8. Arem shiruru tulu ka - (6)
11. Ajunga - (4)

OLONG PAITEP # 7553 TELANGZÜBA

TIPIEN :

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA



Arishi küm 2 ser ita tenet Aishi Gali-i minute 17 ser second 1 nung 100 Pawn Promotion Checkmate Chess Puzzles koktetba ajanga otsü tasen ka yangluogo.

Aishi Gali ya chess prodigy ka lir aser July 2, 2026 nü lai minute 30 nung 75 Pawn Promotion Checkmate Chess Puzzles koktet tsü nükjidadong nung record yanglutsü meranga liasü saka lai ibaji ajangteter minute 17 ser second 1 nung dang 100 puzzles kokteta liasü.

Iba world record attempt ya Gachibowli nung Roy Chess Academy nung agia liasü.

Tripura nung küm 14 tashi angati tesayur inyaka arur



Agartala, July 3, 2026

(Agencies): Tripura nung PM Shri Baidyadighi Higher Secondary School nung tesayur Pratima Pal küm 14 tejakdang sorkar mapa nungi anisüngzük angu saka tanü tashi lai mapa inyaka arur.

Sorkar mapa inyaker aika asoshi mapa nungi sodi anguba

sülen wadang tembanger saka Pal-ibo tenangzükba tasen agishir inyaka arur. 2012 nung lai sorkar mapa nungi anisüngzük anguba sülen tasüng nungi lai 'salaried employee' ka ama masü saka tesayur ka ama inyaksü tenzük.

Iba anogo nungi tenzuka lai anogoshia kaketshirtem sayua

arur aser itasen kecha magir.

June 29, 2026 tashi nung lai küm 14 tashi voluntary teaching inyaka aruogo.

Pal-i 1980 nung Shalgara Town Girls' High School nung Graduate Teacher ka ama inyaksü tenzük. Iba sülen lai government schools balala nung inyaka arur 2012 küm PM Shri Baidyadighi Higher Secondary School nung inyaka alidang mapa nungi anisüngzük angu. Ajsüiaka, lai education nungi mepila.

"Sayuba ya kü atema mapa ka masü, iba ya küm taküm tejangraba ka lir. Ni anema ali tashi ni school-i arutsü aser sen kecha magii kaketshirtem dang sayutsü. Parnoki takok angubaji kü atema sempet tulutiba lir" ta Pal-i ashi.

Assam Rifles-i Myanmar nunger biometric registration drive agi

Imphal, July 3, 2026

(Agencies): Assam Rifles-i Manipur nung district administration, police aser health ketdangsürtem den yaritepa Kamjong district nung jenoka aliba Myanmar nunger biometric registration aser verification drive ka tenzükogo.

Iba mapa ya Phaikhoh, Shangkhalok aser Aloyo yimtsüngtem nung inyaker aser Myanmar nunger aika arua jenoka lir.

Civil administration aser

security agencies nungi ketdangsür 40 shi adenba joint team kati yimtsüng asem nungi nisung 500 shi ka indang identity verification, biometric enrolment aser demographic documentation agiogo.

Kamjong district administration-i administrative planning aser security monitoring atema mapa inyaksü tetuyuba agütsüba ama iba ya inyakogo.

Iba mapa ya Operation Anchor nung Phase II lir aser iba ya coordinated civil-military initiative

lir ta ketdangsürtemi ashi. Indo-Myanmar arrtsülen humanitarian assistance den border management tajungba akümtsü asoshi iba mapa ya inyaker.

Iba biometric database ya mejangjaba nisung malitsü, medical & humanitarian assistance tashishitsü melii agütsütsü aser Centre o state sorkartem nem border management aser internal security atema lemtet agiba nung kuli tejangja agütsütsü nükjidadong nung yanglur.

Tadu Bini & Nani Hao nati Apatani's Next Top Model 2026 angu



Guwahati, July 3, 2026

(Agencies): Arunachal Pradesh nung Tadu Bini-i tetsür aser Nani Hao-i tebur rongnung Apatani's Next Top Model 2026 takok nguogo.

Iba tetoktepba ya Lower Subansiri district kübok Hija Village nung agi aser Tadu Bini ya Mudang Tage nungi aser Nani Hao ya Bulla nungi lir.

Tetsürtem rongnung Bamin Village nungi Hano Sumpi-i

tanabuba aser Hari Village nungi Hage Konya-i tasembuba jenjang takoktem angu.

Teburtem rongnung Tajang Village nungi Mihin Lento-i tanabuba aser Hong Village nungi Tallo Doding-i tasembuba jenjang takoktem angu.

Iba tetoktepba ya Apatani Fashion Week kübok ayongzük aser iba sentong nung Apatani nunger cultural heritage, indigenous fashion aser

emerging modelling talent lemsatapa liasü.

Iba grand finale nung "Colors of Apatani" ta ser traditional attire aser modern fusion ensembles sayuba shilem ka agia liasü aser iba ajanga Apatani maitsü tali jangjadaktsüogo.

Sentong nungsa Dani Haj Puna Clan, SDDFC Daminda Dance Committee aser Diirey Nyimung Dance Group ajanga shilem agi.

Asüpila sentong atema Iran lenir Khamenei tasü mang Tehran nung yua lir

Dubai, Chiteni/July 03 (Agencies): Iran nung tepseter alisang Supreme Leader Ayatollah Ali Khamenei tasü mang Hokulbarnü Tehran nung hall tuluka nung yua lir aser putirtem, ketdangsür, bendang lima nungi tongtipang nisungtem aser mangyimer temi pa nem akhum agütsür, shibai Iran nung küm 37 yimsü süa aru.

Ita pezü rara tenzükdang February ita US aser Israel nati tayimtsü amshia amakba nung tepsetsang Khamenei atema mass funeral processions ya hopta ka agitsü sentong re nemtar.

Khamenei tasü mang ya Qom, Najaf aser Kerbala tesemia bener aotsü imlar, kechiaser item ya Iran aser Iraq nung Shi'ite centres tulutem lir aser iba sülen Brehostibarnü Mashhad nung aremstü, koba linük nung temeshitiba pilgrim shrine lir.

Pa indang tasü mang süngten ya Brehostibar aonung pa bhukumer jepa alidak saya aser parnok tekolak nung mashia mang yima jepa liasü. Hokulbarnü pa indang süngten den ano pa den külemi tepsetba kinungertem süngten külemi pa jakdang Iran yimsü süa alisang Ayatollah Ruhollah Khomeini nem akhum agüja yangluba sarasademba hall tuluka nung ayu.

Asüpila sentong ya Iran asoshi tongtipang mapang ka nung agir, kechiaser Islamic Revolutionary Guard Corps-i yariba putir yimsüsürtem ya par asoshi tesashitiba tsükchir den raraba nung mesama jenbua aliba ama züngshir.

Ajisüaka 1979 revolution sülen küm 50 jungnüa lir, aser ketdangsürtemi linük lungjemtsü sangdongba ama Islamic Republic linük telungzük nung telemsa adokba kangabo majiteter.

Ajisüaka putir lenirtem bhukumba kanga ajema kumogo, ta analysts temi ashir aser Supreme Leader tasenba aser Khamenei'er jabaso Mojtaba Khamenei ya pa tebo tepsetdang yiruba sülen pa indang noksa tasena mangur.

Küm aika rongsenketzüng nung tenokdangba agüja aliba ajanga rongsenketzüng jenjang mejungi akum aser nüburtemi linük tesem ajunga nung longkak ait tenzükba yong security forces temi tashiyim tali amshia January ita longkak aiter meyirijang aika tepset.

Tan hopta item tebilemstü tezü nung yutsür ketdangsür temi linük tashi aser nüburtemi parnok bhukuma lir ta sayutsü mechi nübu ayongdener aser asüpila sentong nung mangyimer million aika shilem agitsü imlar.

Tehran yimti kanga junga azüoka lir, kong mitkar aser police gari tem tongtipang lenmang nung yua lir aser police aser black-shirted volunteer Basij paramilitary force züngsemtem motorbikes nung senzür.

Iran-i United States aser Israel dang asüpila sentong mapang mamaktsü tekumdangtsü shia lir.

Khamenei süngten tema nung putir temi inokba turban ka yuja lir, koba Islam indang Prophet Mohammed nungi

senmang aruba ta parnok ashir. Iba sentong nung Russia aser China nungi arua adentsü imlar. Iraq, Armenia aser Pakistan nungi ketdangsürtem iba asüpila sentong nung adentsü asoshi Tehran nung arua lir.

Hezbollah lenir Hassan Nasrallah aser senior commander Imad Mughniyeh kinunger iba sentong nung aden, shirnok Israel-i amakdang tepset aser Iran tembar liasü.

Hokulbarnep Iran tir, parliament speaker, foreign minister aser tangartem adenshia nüktzü yima ajep aser sarasadema liasü.

Iran indang theocratic system nung Khamenei ya linük tekolakba aser revolutionary movement nung lenir ka asüba kisüng masü saka alima nung Shi'ite Islam indang 12 buba imam melen liasü, shiba century toku buba nung sama.

Khamenei den külemi tepseter rongnung par jala, apang aser semchir kinü aser par jabaso Mojtaba kinungtsü liasü aser pa anasa parnok indang süngten yua lir.

Islam yimsü nung nisung ka sür anogo ka nung aremer, saka rara mapang asüpila sentong tulu agiba nung lendong lir ta ajiteta iba sentong thinena liasü.

Hombarnü central Tehran nung procession tuluka agiba sülen tasü mang ya Qom yimti nung Mongulbarnü sentong agitsü atema bener aotsü.

Iba sülen Bodhbarnü Iraq nung Najaf aser Kerbala yimtittem nunga agitsü. Pa tasü mang ya Brehostibarnü Mashhad nung Imam Reza leper anasa aremstü.

Europe nung tatsük agi nisung 3,700 dak tema süogo

Paris, Chiteni/July 03 (Agencies): June ita heatwave mapang France, Netherlands aser Belgium nung nisung 3,700 dak tema asüba tejangja lir, koba ajanga Europe tesem ajungalen temperature tali kumdaktsü aser ketdangsür temi asüba ya timba alitsü ta ashir.

Iba heatwave ya June20-28 tashi liasü, koba Euripe nung tamajungtiba lir, ta mongin temi ashir aser iba ya ajanga power generation nung timtem agütsü, infrastructure raksatsü aser healthcare system agi mokoki akum. Ibai tzü-mopung melenba ajanga lir ta scientist temi ashir.

Iba heatwave mapang France nung nisung 2,025 dak tema asüba lir aser talisa arishi küm 45 tema nisungtem timba, ta French Health Minister Stephanie Rist-i Hokulbarnü ashi.

Iba jakdang den medemdangra June 22-28

tsüngta kidang asüba shilem 91 agi tali akum aser ano nursing homes aser healthcare facilities nung asüba timba kumogo, ta linük indang public health authority ajanga ashi.

"Asüba ya tang züngdanga aliba dang nungi timba asütsü," ta ketdangsürtemi ashi.

Belgium nung June 18 aser 29 tsüngta nisung 1,200 dak tema asüba tejangja lir, aser yangji nisung 530 arishi küm 85 aser temapurtem lir, ta Health Ministry ajanga Brehostibarnü ashi.

Arishi küm 65 tekübok asüba 180 lir.

"Heatwave mapang iba ama nisung asüba ya asen linük nung tamalen majangshidangba lir," ta ministry ajanga ashi.

Netherlands nung ketdangsür temia heatwave ajanga nisung 480 dak tema süogo aser parnok timba arishi küm 80 tema lir ta ashir.

Pakistan longren ka nung bus tsükok, nisung 32 asü

Quetta, Chiteni/July 03 (Agencies): South-western Pakistan nung nisung tali mena aliba passenger bus ka longren-i aliba lendong nung nisung 32 asü aser 16 yiru.

Bus ya Quetta nungi Peshawar bushia aiba mapang Balochistan aser Khyber Pakhtunkhwa provinces arütsü nung aliba Dana Sar mountain range nung Hokulbar anepdang 8:00 ako meta lendong ya ajuru.

Iba lendong atalokba mapang bus nung tetsür aser tanurtem densema nisung 48 mena liasü, ta Zhob Hospital nung sorkar ketdangsür kati osangbener dang ashi.

Iba lendong atalokba ya tang bushisüngdangba mapang lir, saka tang tashinung steering meshidakba ajanga gari anisangi mazüokteti longren leni ajüzüka alu südi ta angateter.

Iba tesem nung tangokba noksa tem nung bus ka kanga mejungi ajasar aliba nguogo.

Yirur alirtem ya iba lendong atalokdak nungi kilometer 68 shi pilar Zhob nung District Headquarters hospital bushia anir ogo ta ketdangsür temi ashi.

"Bus ya longren leni feet 70 nungi 80 shi mekazüka lua tsük," ta Zhob district emergency service tekolakba Sanaullah Sherani-i ashi.

Iba lendong atalokba sülen emergency responders aser

ambulance aika yoka liasü, saka lisa majungba ajanga kumzüksü aser bushitsü mapa nung tetsükdaktsü ajurur.

Asürtem tasü mang mozüki bushia bener ao aser jangjaba sülen ambulance ajanga pei aliba tesem bushia bener otsütsü.

Bus ka raksar aliba nungi passenger tem anioksema iba bus nung nisung tali mena liasü ta osang angazüker, ta Balochistan chief minister indang odongtar Shahid Rind-i ashi.

Tir Asif Ali Zardari aser Ato Kilonser Shehbaz Sharif natia asükhu lemsatepogo.

Balochistan Chief Minister Sarfraz Bugti-i social media X nung, iba lendong atalokba angazüka kanga jashir aser iba tatalokba bushisüngdangtsü totuyuba agütsüogo, ta ashi.

"Asür kinungertem den ni asükhu lemsateper aser yirur alirtem tekeraba nung taneptsü angutsü atema sarasademsür," ta pai ashi aser yirur alirtem nem medical teyari agütsüogo ta ashi.

Pakistan lenmang nung gari tapi agi anishiba, lenmang majungba aser gari tem junga anepalu masüba ajanga iba ama lendong ya mapang shia ajurur.

2024 küm Eid benjong amungtsü asoshi Balochistan-i aoba bus ka longren nung tsüka temeshi ainlen jajar nisung 17 asü aser 40 yirua liasü.



ANM, SCHOOL OF NURSING
IMPUR CHRISTIAN HOSPITAL
IMPUR:798615, Mokokchung, Nagaland

Ref No. ICH/SON – 1/GC/21 – 25 *Dated:4th July 2025*

ADVERTISEMENT

Applicants are hereby invited to undergo 2 (Two) years Course in ANM(Auxiliary Nurse Midwife) training for the academic session 2026-2027 at ANM, School of Nursing, Impur Christian Hospital, Mokokchung (recognized by INC).

- Candidate should be PU (10+2) from any stream with 40% from recognized English medium school Board and 45% from Recognized National Institute of Open School.
- Candidate should be unmarried.
- Eligible Age : 17yrs to 25 years as on 30th SEPTEMBER 2026.
- Number of seats : 30
- Forms for interview will be available at Impur Christian Hospital, Impur Diagnostic centre Mokokchung , for download ,scan the qr code .
- Form submission can be done at the School office during office hours (**Monday-Friday:9am– 1pm**) or mail all required document in pdf format at **ichabam2015@gmail.com**. (Required documents mentioned in the form).
- Last date of form submission is 4th September 2026.**
- Session will start from 1st October 2026.**
- Written and oral interview dates will be notified later.
- For query contact 8732867275. (Mrs. Roty – Nursing Tutor).**



Sd/
Medical Superintendent
Impur Christian Hospital

SCAN ME FOR FORM & PROSPECTUS

FIFA World Cup 2026: Spain, Portugal aser Switzerland last 16 tongogo

California, Chiteni/July 03 (Agencies): Brehostibarnep Spain-i World Cup nung par den asayatsüpur kumdangtsü sayua Austria madak 3-0 agi takok ngua last 16 tongtetogo, kong Mikel Oyarzabal-i goal ana agütsü.

Spain ya iba asayamung nung teimla akaba team tem rongnung ka ama arua tangtashi goal kata machi aser tetenzüklen Cape Verde den draw asü saka Southern California nung Austria-i par den kasa masayatet.

Spain nungeri goal idaktsütsü merangba aser talisa teinlonglong forward Lamine Yamal nem temulung kanga agüja liasü, aser kasa mapa par defence maneni junga asayatet.

Brehostibarnü parnoki target nung ball metsüoktsütsü memela, koba 2014 küm Germany-i Argentina den asayaba nung atalokba sülen World Cup knockout match nung tang mezügbuba alitsü.

Spain ya quarter-finals nung Portugal den asayatsü.

Spain nungeri kanga junga asaya tenzüka Lamine-i Austria defense nung alirtem tanen makai timtem agüja liasü.

Marc Cucurella-i anameta nungi goal ka agütsütetogo ta bilem, saka goalkeeper Alexander Schlager dak aibelenba ajanga iba goal ya

magi.

Ajisüaka ano Cucurella-i cross ka agütsüba nung Iyarzabal-i aibelen mesür goal agütsüteta Spain bhukuerm timba aliba telok pelatepa liasü.

Halftime tashi Schlager-i ball aika nokdangteta Austria teimla nung yutsü.

Second half nung Austria asoshi maongka tajungtibaji Sasa Kalajdzic-i angu, saka pai tekolak agi tongloksüba ya goal post nung tsükdaka liasü.

Pedro Porro-i minute 66 buba nung tekolak agi Spain asoshi goal tanabuba tonglokja liasü.

Oyarzabal-i ano minute 89 buba nung goal ka agütsütet, koba iba asayamung nung pa asoshi goal pezü buba liasü.

Toronto nung Cristiano Ronaldo-i World Cup knockout-stage nung pa asoshi mezügbuba goal agüja, Goncalo Ramos-ia stoppage-time nung tekolak agi goal ka tonglokja Brehostibarnü Croatia madak 2-1 agi takok ngua Spain den last 16 asayatsü jangaogo.

Asaya tatemlen Croatia-i sako kumdahtsür ama liasü, aser indangji Ronaldo asaya anener liasü, ajisüaka video assistant referee repringshiba nung offside liasü.

Minute 103 buba ung Josko Gvardiol-i Croatia asoshi goal tanabuba agütsütetogo ta bilema liasü, saka tanaben

repringshiba nung ball yagi Igor Matanovic dak kongshi, anungji Gvardiol ya offside akum.

Arishi küm 41 tain Ronaldo ya World Cup ka indang knockout stage nung goal agütsür rongnung tambotisang kuma minute 68 buba nung penalty ka yoktet aser substitute Ramos-i stoppage time atongtsü minute pezü lia goal ka ya agütsü.

Minute 53 buba nung Ivan Perisic-i Croatia asoshi goal ka ya agütsütet aser telok anaprong kasashi asaya liasü.

Croatia ya 2018 World Cup runners-up aser 2022 nung tasembuba jenjang tongteta liasü. Vlasic-i Renato Veiga atsüita yur alangdahtsüba ajanga minute 68 buba nung Portugal captain-i penalty nung goal ka ya yoktet.

Portugal asoshi ibai temulung shiranga asayaba mapang ka liasü, kechiaser küm ka tejakdang par forward Diogo Jota gari lendong nung asüba bilemteta amungtsü anogo ka lia Croatia den asaya.

Asaya tembanger Ronaldo-i temulung shiranga Jota indang No. 21 tula semer liasü.

Portugal ya Hombarnü Dallas nung Spain den asayatsü aser iba asaya nung takok angur ya quarter-final nung Belgium mesüra United States den

asayatsü.

Maneni Vancouver nung Brehostibar nikongdang asaya ka nung Switzerland nungi Breel Embolo aser Dan Ndoye nati goal ka-ka agüja Algeria madak takok ngua last 16 tongogo, kong parnoki taruba hopta Colombia mesüra Ghana den asayatsü.

Iba takok ya Switzerland asoshi knockout stage nungbo 1938 sülen tang mezügbuba alitsü.

Switzerland aser Algeria asaya kanga mesükteper liasü, kechiaser Algeria coach Vladimir Petkovic ya 2014 aser 2021 tsüngta Switzerland coach inyaka liasü.

Asaya tenzüker minute 10 buba nung Embolo-i mezügbuba goal ya agütsütet aser iba sülen Switzerland possession melenshia midfield nung nisung pongu asaya.

Algeria asoshi maongka tajungtiba ya first-half atongtsü lia Ibrahim Maza-i ngutet saka pai metsüoktsüba ball ya post anasai ajanga ao.

Anisüngzüker asaya tenzükli Rafik Belghali-i temulung ajak agibo mesüi clearance ka agütsüba Ndoye tetsüng agi soita Algeria goalkeeper Luca Zidane alema yoka liasü.

Swiss nunger ya last 16 nung Colombia mesüra Ghana den July 7 nü asayatsü.



TESÜSABA ASAYA OSANG

Spain	3	0	Austria
Portugal	2	1	Croatia
Switzerland	2	0	Algeria

JULY 3 & 4 NÜ SAYATSÜPUR

11:30 PM	Australia	VS	Egypt
3:30 AM	Argentina	VS	Cabo Verde
7:00 AM	Colombia	VS	Ghana
10:30 PM	Canada	VS	Morocco

JULY 5 NÜ SAYATSÜPUR

3:30 AM	Argentina	VS	Cabo Verde
7:00 AM	Colombia	VS	Ghana
10:30 PM	Canada	VS	Morocco
2:30 AM	Paraguay	VS	France

NCA Apex Council ketdangpur tasen shimogo



Dimapur, Chiteni/July 03 (TYO): Board of Control for Cricket in India (BCCI) nung affiliate süa aliba Nagaland Cricket Association (NCA) indang mezügbuba Apex Council Meeting cum Apex Council tasen 2026-2029 kümsük atema shima alir nem mapa amoktsüba sentong ka Hokulbarnü NCA indang Conference Room nung agia liasü.

Tang tasen shimba Apex Council nung tir Watinuksung Jamir, tatong tir Khamongo Humtsoe, secretary Menguvilie Sakhrie, joint secretary Nikika G. Zhimomi, treasures Ketholelie Sogotsu aser Apex Council Member Vezokho Chotso alitsü.

Iba senden ya Apex Council tasenba kümsük tenzüka temaitsü alitsü, aser iba senden nung ketdangpur mapa yutsür temi Association teinyaktsü mapa tem tasenpur nem amoktsü.

Iba senden amenba sülen Apex Council züngsem tejenpur aser tasenpuri Nagaland Chief Minister aser Nagaland Cricket Association indang Chief Patron, Dr. Neiphiu Rio aser Nagaland Cricket Association indang patrons Abu Metha aser K.T. Sukhalu nunger ajurua parnoki state nung cricket jenjang ajungkettsü asoshi tanen makai yariba asoshi pelaba lemsatepa liasü.

NCA-isa Secretary Devajit Saikia lenisüba kübok BCCI-i

masetshie yariba asoshi pelaba lemsatep.

Apex Council züngsem tasenpuri Sovima Village Council chairman Sebastian Zuvu den ajurutepa Nagaland Cricket Association den mapang talangka nungi par yimtsüngi teka amteper yaritepa aruba asoshi pelaba lemsatepa liasü.

Nagaland Cricket Association-i Apex Council mapa yutsürtem dang bendanga agütsür inyakba asoshi pelaba metetdaksü aser Apex Council tasenbai cricket ketdangtsüba tashi itshitsü, sempet adokdaksütsü aser Nagaland tesem ajunga nung cricket aintsü aser terenlok asoshi inyaktsü tamang akar, ta ashi.

Osaka-i Wimbledon round pezü buba tongogo

Wimbledon, Chiteni/July 03 (Agencies): Taoba mapang world number one nung alila Naomi Osaka-i Daria Kasatkina madak takok ngua mezügbuba Wimbledon round pezü buba tongtetogo.

Osaka-i Grand Slam singles titles pezü tashi nguteta aliba ajunga hard courts nung akokba lir, aser lai French Open clay aser All England Club grass-courts nung asayatsü timtema aru.

Ajisüaka Japan tsür seed 14 buba nung alila-i minute 65 nung Kasatkina ya 6-1, 6-3 agi tsükdaktsü.

Roland Garros nung tang mezügbuba last 16 tongteter hopta pongu majungdang Osaka-i tanü iba jenjang tongtet.

Osaka ya last 16 nung top seed Aryana Sabalenka den asayatsü akok, shiba Hokulbarnü Latvia tsür Jelena Ostapenko den asayatsü lir.

"Ni tanü kanga junga asaya ama bilemer. Tesüba hopta ana ni grass nung asaya aika asayaogo, anungji ni temulung

lema bilem," ta arishi küm 28 tain Osaka-i ashi.

Osaka-i mezügbuba grass-court final ya taoba ita Bad Homburg Open nung asaya liasü, ajisüaka Karolina Muchova den set tanabuba tenzükdang yirur asaya nungi anisüngzüksüsa akum.

Ajisüaka Germany nung lai yamaji asayatetba ajanga iba surface nung asayatsü asoshi temulung ulushia liasü aser Wimbledon nung lai set kata tangar nem mokokdaksüi lir.

Mezüng sen nung Osaka-i unforced errors trok aser serve nung points pongu akoksa.

Australia tsür Kasatkina ya set tanabuba nung tajungba asaya, saka Osaka-i tajungba asayateta liasü.

Osaka-i 2018 aser 2021 tsüngta US Open anaben aser Australian Open anaben akok, saka la tanur sor 2024 küm meyipa shilangba sülen Grand Slam indang round pezü buba tashi khen kisüng asayadanga lir. Lar jala Shai ya Brehostibarnü küm asem jungogo.

BILEMDANGANG

"Tesangwa nung kisüng jajaba dang nungibo tembar den ammag nung jaja tajungba."